

Prome celebracion di Aruba Dag na Hulanda tabata algo grandi

Dia 12 di maart 2006 comunidad Arubano na Hulanda lo celebra nan "Dia di Himno y Bandera" na grandi na Hulanda. Dia di Himno y bandera, miho conoci como "Arubadag". Pa hopi aña caba Arubahuis ta haci un tremendo esfuerzo pa brinda tur Arubiano na Hulanda e oportunidad pa celebra nan dia di Himno Y bandera na tera frieu.

Locual hopi hende no sa cu e promer Arubadag organisa na Hulanda tawata na 1976. Ta despues cu señora Rosinda "Dechi" Langedijk Thijssen a regresa for di Aruba, unda e a presenta e himno di bandera na Aruba, cu el a dicidi di organisa un dia na Hulanda pa celebra e Himno y Bandera conhuntamente cu e comunidad Arubiano.

Señora R. Langedijk Thijssen e tempo no tawata un desconoci pa e Arubiano residencia na Hulanda. For di momento cu defunto Betico Croes (qepd) tawata lucha incansablemente pa e Isla Aruba, señora R. Langedijk Thijssen tawata

skirbi un hala di carta pa diferente ministro na Hulanda pa pone nan na haltura cu Aruba mester wordo scucha.

Tempo cu Aruba a determina cu nan lo bin cu nan propio Himno y bandera el a dicidi di bai Aruba pa presenta e himno di bandera na Aruba. Ora di regresa Hulanda, señora R. "Dechi" Langedijk Thijssen a cuminsa plania un dia unda tur Arubiano na Hulanda por a presenta pa celebra e Himno y Bandera di Aruba.

Pa medio di algun aviso paga den corant Hulandes, el a pone e comunidad Arubiano na haltura. Y como un bon custumber crioyo di nos Arubiano, "Un boca a bisa otro" y e noticia a cuminsa plama.

Tawata na luna di juni di 1976 cu e porta di e buurtcentrum Hofgeest na Amsterdam Zuidoost (E bario Bijlmer) a habri y durante henter dia tawata un bai bin di Arubiano cu tawata bin for di tur skina di Hulanda.

No tawata cobra pa entrada y tawatin cuminda y bebida por

nada pa tur bishitante.

Señor Pedro Croes a toca e himno "Aruba Dushi Tera" riba su guitarra, y esnan presente cu hopi emocion tawata canta e himno cu tur nan alma. Despues e DJ Toñito Coll a deleita tur presente cu musica varia, y unda tur tawata baila y gosa te na ora laat.

Arubadag 1976, un gran experiencia pa tur esnan presente e dia ey. Si nos wak con grandi e celebracion di Arubadag ta na Hulanda awor, sigur señora Langedijk Thijssen no por a soña cu e evento cu el a cuminsa cune, lo por a crece bira asina grandi manera e ta awor. Hasta cu banda te for di Aruba ta wordo busca pa entretene e publico presente na Arubadag.

Arubadag, un tremendo dia unda tur Rubiano na Hulanda por celebra na Himno y Bandera cu orguyo. Arubadag, no solamente pa hende hoben, no solamente pa hende di edad, no solamente pa e Arubiano, pero pa tur Arubiano y otro nacionalidad cu tin un amor pa Aruba, y un respet pa Aruba



su Himno, Bandera y Cultura. Laga nos no lubida e pionero den tur esaki, señora Rosinda "Dechi" Langedijk Thijssen, cu a organisa e prome Arubadag na aña 1976 na Amsterdam Hulanda. Pa mas informacion y potret di entre otro e prome Arubadag, por bishita www.arubadag.com

y click riba e link: "Oorsprong"

Riba e potret nos por mira for di man robes pa man drechi: Theolindo Lopez, Chebi Wernet, Rosinda "Dechi" Langedijk Thijssen y Fransisca Eckmeijer)